

周
易
正
解

牝馬。衆偶在下。馬蕃庶之象。離午爲馬。馬在離下。有
自王錫之象。晝日亦離象。三接三爻之象。周禮大行
人三饗三勞三問。皆王接諸侯之禮。詩云。君子之馬
旣庶且多。亦謂王馬用錫也。或謂諸侯貢馬于王。非
是。

離在上。有精白上達之象。坤在下。有俯鑒忠順之象。
日照臨下。土地仰借光明。爲上下交之象。

彖曰。晉。進也。明出地上。順而麗乎大明。柔進而上行。是
以康侯用錫。馬蕃庶。晝日三接也。

晉者。當晝而進也。雜卦傳曰。晉。晝也。日出地上。四海

同明坤以順仰麗乎明。是純臣之從君也。離以柔上行居尊。是明主之臨下也。上明下順。是諸侯附順天子之明德。以時來寧。而爲康侯。明主深嘉康侯之安順。厚其錫予。隆其禮遇。親接榮顯。所以爲晉也。

象曰。明出地上。晉。君子以自昭明德。

曰。自地昇天。普照如人形骸。含藏神明。意誠心正。則天光煥發于形氣之表。而明明德于天下。非張飾于形迹。借資于耳目。所以自昭其明德也。蓋火以麗生。明无所麗而浮光外炫。是日不自地出。邪慧而已。故自昭明德。不以聲華浮榮。是君子之明出地上也。

初六晉如摧如貞吉罔孚裕无咎象曰晉如摧如獨行正也裕无咎未受命也

三陰之進以六五明主在上也九四一陽乘下卦之交互爲坎艮以生蹇難初六正應故爲晉如欲進而其體陰柔又爲摧如被阻之象然坤厚安貞自守故吉初當始進其順未孚寬裕以需自可无咎否則渝而改節或悻以傷義坤德廣大可必无斯蓋晉之時有進无退君明而柔臣招權取禍不遇九四不足以明康侯之順所以雖未孚而能正靜以俟也象曰晉如摧如獨行以正不求通于權門也裕无咎者初居

晉下其交方淺未蒙三接受蕃錫之命也宜裕以俟之豈肯媚權臣而求進乎是康侯之始至也

初六摧如傳以獨行正釋者明不以阿附爲摧如也坤德順而貞旣无取罪之端亦无失身之辱如夫子之待陽貨是也

六二晉如愁如貞吉受茲介福于其王母象曰受茲介福以中正也

二柔順中正當晉而愁以九四專而畏五之不應也卽詩云勿予禍譴之意居中守正自可得吉五以陰居尊是爲王母二柔順而五文明有臣如此蕃錫三

接之大福。不于二而安施。二動成坎。有愁象。坤爲母。二本坤。離中亦坤。以二事五。是母之母。故有王母之象。象曰。受茲介福者。六二中正。述職而來能愁如是。康侯之心也。

六三。衆允悔亡。象曰。衆允之志上行也。

三與明接。居衆之上有率下附上之象。上從明主。衆所同願。坤爲衆。順極有衆允之象。衆皆信之。與罔孚異矣。順而向明。无復摧愁。故悔亡。象曰。衆允之志。晉道至三而成三。當諸侯之位。進與明交。所謂柔進而上行。麗乎大明。是康侯之晉接也。

玩彖爻之象。康侯似爲九四來者。故云摧如愁如。伐邑傳云。受命上行道未光。皆以四之故。六五離德。文能附衆。明能知人。故燭鼠竊之奸。集康侯之衆。以討賊臣。六三以方伯率諸侯勤王。衆允受命。與上伐邑。鼯鼠伏辜。晉道大光。所以有蕃庶之錫。獎勤王之功也。

九四晉如鼯

石鼠

貞厲象曰。鼯鼠貞厲。位不當也。

以陽居四。不中不正。當上下四陰之中。互爲坎艮之主。坎爲隱伏。艮爲鼠。坎隱傷明。艮止傷順。互爲蹇難。以阻其晉。故九四爲晉之貪悞臣也。有鼯鼠之象。鼯

鼠卽詩所云碩鼠貪殘之物上承柔主下利羣陰守此不變危厲之道象曰鼯鼠貞厲以陽居陰不明不順厲所由來也鼠畫出不當位之象

六五悔亡失得勿恤往吉无不利象曰失得勿恤往有慶也

六五以陰爲離主在上高而明柔而得中何悔之有九四雖攘下竊上勿憂其失衆志不允亦終得也由此而往以明伐罪則鼯鼠伏辜以明賞功則康侯承寵吉无不利象曰失得无恤往自有慶威福皆由明主出也往行上伐邑也

上九晉其角。維用伐邑。厲吉无咎。貞吝。象曰：維用伐邑，道未光也。

九以陽居離上。離爲牝牛。上有角象。東方日出之宿亦曰角。楚辭天問云：角宿未旦。曜靈安藏。是也。離爲甲冑。故爲用伐。九四鼫鼠有罪。當問與五同體。是爲私邑。四在地上。有邑象。動兵邦內。故厲。君正臣罪。故吉无咎。雖得正。非明世所宜有。故羞吝。五雖明而柔。以錫恩寵有餘。以運威權不足也。象曰：諸侯賓服。而君側有未戢之奸。鼠畫出而動干戈于邦內。其于晉明之道。未得光大也。反而爲朋夷。如湯武之征伐。則

其道光矣

或疑晉大明之世九四不宜爲貪權之臣然爻以一剛梗羣柔之中當五位之前互坎之險互艮之堅虧明順之體其象昭然或又謂上九以剛居外而五伐之非伐九四也然傳云道未光非指互坎損離者而誰與離火光明九四以位不當害之反爲明夷居三有南狩之象傳云乃大得謂昔未光者今乃大得耳則晉之伐四甚明也

明夷
三三
離下
坤上

序卦傳曰晉者進也進必有所傷故受之以明夷夷

者傷也。天下莫危于仕進之路。進而不已。必傷。時有泰否。道有顯晦。時與道違。雖聖賢不免焉。在晉之時。明主當陽。康侯得遂其寵。明夷之時。暗主臨御。衆正并受其傷。離來居下。地往居上。日入地中。明受其夷。道不可以直而望用。賢不可以正而見容。仁者懷其寶。知者藏其鑑。故彖傳以商紂之時。文王箕子當之。六爻初爲明夷之始。見幾早去。伯夷太公是也。二文明中正爲離之主。承坤之下。文王是也。三居明極。當暗之交。與上六敵應。武王是也。四居暗下。乘明之際。應初比三。歸周之微子是也。五居坤中。承暗主。艱難

守正箕子是也。上窮陰極晦。乃殞于地。商紂是也。故
雜卦傳曰。明夷誅也。內卦離明。以象周之興。外卦坤
陰。以象商之滅。

明夷利艱貞。彖曰。明入地中。明夷。內文明而外柔順。以
蒙大難。文王以之。利艱貞。晦其明也。內難而能正其志。
箕子以之。

夷傷也。離居坤下。明受其傷。昏暗之世。利在艱難。守
正而已。彖曰。坤上離下。是明入地中也。故爲明夷。離
在下。內文明也。坤在上。外柔順也。以此韜光蒙大難。
內不失其聖。外不卽于凶。此文王所用之道。是謂之

明夷也利艱貞者自晦其明不敢露才揚已爲矯激之行也遭逢內難誼同休戚身被囚奴能正其志不爲邪諂卒免于禍此箕子所用之道是謂利艱貞也○文王演易卽姜里之日箕子敘疇在釋囚之後疇數與易數合故夫子于易并舉而贊之

象曰明入地中明夷君子以莅衆用晦而明

明入地中非无明也明在內而不炫以此莅衆含宏包荒不刻核以爲知涇渭雖辨器宇休休易簡而理得衆親而人安用晦所以爲明也古之聖人旒纁以塞聰明樹屏以蔽內外不欲明之盡乎隱也豈惟處

昏亂之朝爾耶故夫乾之健也剛而无首大壯之壯也易而亡羊明夷之明也晦以用明可知易矣

初九明夷于飛垂其翼君子于行三日不食有攸往主人有言象曰君子于行義不食也

卦以上六爲明夷之主自五而下皆明之受其夷者初爲離始處夷之初去上獨遠受傷淺而見幾早離爲網罟南方之卦其星鳥有飛象言其去之速也垂其翼謂受傷而翼飛无力也傷而後行已遲矣是以君子于行三日不輟饑不遑食行有所往主人謂六二往則依二二爲離主下乘初奇似兌爲口有言象

詩云文王曰咨咨女殷商卽有言之義初九蓋伯夷
太公之流避紂歸周者不食紂祿文王善養老慰藉
之其象如此象曰君子于行三日不食以義在潔身
遠害不食其食也

晉爲日出明夷反晉爲日落日君象君以賢人爲羽
翼以忠臣爲股肱其身爲元首親戚大臣爲腹心乃
可登天照臨下國也初九賢人去則羽翼傷六二股
肱傷九三元首墮矣四五腹心離矣上所以晦入于
地也

古稱日爲陽鳥淮南子云日中有踆鳥故有飛象翼

南方朱鳥之宿名。初在下。有垂翼之象。鳥宿象鳥西飛。日西行。歸周之象。君子。初陽之象。互震有行象。日行一日一周天。亦飛行之象。初自晉離上來。晉五以下互坎。坎爲酒食。自晉五至明夷初。歷三爻。有三日不食之象。

六二。明夷夷于左股。用拯馬壯。吉。象曰。六二之吉。順以則也。

六二以明受夷。自晉來下。故爲傷其左股之象。股者。臣象。虞書曰。元首明哉。股肱良哉。元首叢脞哉。股肱惰哉。股肱傷。是元首之災。拯救之用馬強壯。可免于

難而吉也。拯股亦以爲首也。東北爲左後也。西南爲右前也。卦反晉受傷而下。以內爲前。上六在外。故傷其後股。周京在西。紂都東北。亦左象也。互震故爲馬。壯文王拘于羑里。其臣散宜生輩救之。故有此象。象曰六二中正爲臣止敬順其則不違也。詩云順帝之則文王也。

爻于三言首于二言股。文王之志也。文王以元首戴紂以身爲股而受其夷。壯馬拯股實首之利。使文王死于羑里。則商之亡不待武王嗣服十年之後矣。九三之南狩不疾亦體文考之志。與武王伐商非得已。

也

九三明夷于南狩得其大首不可疾貞象曰南狩之志乃大得也

九三當暗之交以剛居剛離明熾盛上應晦陰故亦爲明夷離爲兵于方爲南周興自南始也卦由離適坤有南狩之象三互震動有狩象陽爲大上爲首三居離首上居卦首以剛勝柔爲得大首之象指武王誅紂懸首大白之事也二得中順則故拯其股三數窮理極故獲其首拯貴急故用馬壯狩貴時故不可疾以明誅暗故得正象曰南狩之志非富天下也濟

世安民乃大得也。視晉上九伐邑，不爲有光乎。此一爻也在晉爲鼯鼠之厲，在明夷爲南狩之貞，亦足以見易之變在時。六二中正，故文德无以加。武未盡善，時遭其窮，亦末如之何矣。周公身與其事，故繫之爻象親切如此。世儒謂文王作爻辭謬矣。

三上正應爲武王誅紂之象，然紂死在微子去箕子奴之後，四出門庭，五明夷而後上入于地，故爻言不可疾，傳言志以釋之。明聖人不先時也。詩歌武功，所以謂酌。

六四入于左腹，獲明夷之心，于出門庭。象曰：入于左腹。

獲心意也

四乘明與晦同體。下與初正應。感于初之見幾而揣知上之終不可輔。故爲入于左腹。獲明夷之心。出門庭而去。將從初以就明也。前當二三似艮爲門庭之象。卦體內外之交爲出門庭之象。上六在後爲左坤爲腹。腹者衷曲之地。肺腑之親。指微子也是時比干死。微子度紂將殺已去歸周。其象如此。象曰。入于左腹。獲心意而知避也。

六五箕子之明夷。利貞。象曰。箕子之貞。明不可息也。五居暗中。上承晦主。詎无可復去。惟痛自屈辱。以全

其貞故爲箕子之明夷象所謂內難而能正其志者也。卒以免禍授洪範于周。故利貞象曰。箕子之貞。執志不回。閤不能沒。雖被囚奴。其明不可揜也。

當是時。比干死矣。微子去矣。苟箕子又死。无益也。又去无爲也。故甘心囚奴。有得中之象。五本君位。爻以箕子居之者。明紂不可君也。箕子紂諸父。帝乙之弟。商禮兄終弟及。箕子嘗勸帝乙立微子。不聽。竟立紂。及比干誅。微子去。天下之望屬箕子。商一綫之緒。延之須臾者。箕子也。故紂之所忌。亦莫如箕子。爻象以五位處之。彖傳謂之內難此也。五爲陽明。六爲陰晦。

以六晦五故爲箕子之明夷。蜀才改箕子爲其子。拘也。紂死。武王釋箕子囚。問道而得洪範。傳所謂不息之明。與文王演易同。夫子所以并贊之也。

上六不明晦。初登于天。後入于地。象曰。初登于天。照四國也。後入于地。失則也。

上六坤極。爲日沒地中之象。故不明而晦。初登于天。升自暘谷。晉象也。後入于地。沒于虞淵。明夷之象也。詩云。殷之未喪師。克配上帝。又曰。天位殷適。使不挾四方。升天入地之謂也。明夷反晉其象如此。象曰。初登于天。照四國也。不明之主。亦嘗爲天下君。及其失

道則爲獨夫喪其大首。是後入于地也。夫非以其失
君則之故與。六二順則故免于難。上六失則故卽于
凶。文王以順則而王。紂以失則而亡。爲人君止于仁
爲人臣止于敬。斯各當其則矣。

家人

䷤

離下
巽上

序卦傳曰夷者傷也傷于外者必反于家故受之以家人。朝市非久集之所仕見傷而反家施于有政是亦爲政。昔者文王釋羑里之難友爲西伯敬止緝熙刑于寡妻至于兄弟化暨江漢汝墳二南作而周道興其于卦位正東南巽離之方也其事正家人女貞之事也故卦以繼明夷孔子謂伯魚曰人而不爲周南召南猶正牆面而立萬物齊乎巽相見乎離人道齊乎家相見乎國與天下巽木爲風離火爲明火得木而生得風而熾位本相值而性情復相得故其象

爲家人。撓物莫大乎風。是君子之德也。始于身。行于家。達于朝廷邦國。是風之自也。閨門幽隱。情勝愛溺。中葺之事。闇沕失道。則不可以風。故風以明爲本。風自火出。君子所以致儆于言行也。卦取二女何也。男女人道之先。夫婦閑家之本。朝廷邦國。非婦人之事。居室則不能廢婦人。人唯女子難養。唯女子之賢難得其質柔。故多偏昵。其性陰。故多暗昧。不學問。故不知禮義。无觀瞻。故不知廉隅。天下之猜很兇淫者。多由婦人。故家人取象女貞也。離女得中而明。巽女陰在下而順。明而順。賢女也。明則无瀆倫亂禮之愆。順

則无驕亢侈泰之失。无瀆亂則知守禮。无驕亢則不起爭。保家莫善于此。而其本在男子。傳曰。男正位乎外。女正位乎內。父父子子。兄兄弟弟。夫夫婦婦。而家道正。正家而天下定者。男子之事也。君子言有物。行有常。暗室屋漏。如對三光。其爲父子兄弟足法。是離之明也。以此出而臨民。可以樹表極。而无慙德。可以胥教誨。而无愧辭。是巽之順也。故其卦爻。長女居上。六四爲巽主。以從五。中女居下。六二爲離主。以從三。以陰居陰。各當其位。長上中下。各循其序。從三從五。各得其耦。陽外陰內。各司其事。此四爻者。家之人也。

初上象父母。母閑于初。父威于上。二爻皆剛。所謂嚴君也。有天地而後覆載成。有君相而後邦國建。有父母而後家道立。家立而後家衆集。父母嚴而後家人齊也。古稱治國易。正家難。蓋國人可以義裁。家人主恩。恩勝義掩。莫甚于閨門。惟淑女與君子同心。夫制而婦從。愛憎公。威惠行。而後家可齊。未有道不行于妻孥而能正家者。父母之責也。下卦爲齊家之事。初曰閑。二曰順。三曰節。自天子至庶人。凡有家皆用此道。上卦爲家齊之事。四爲富。世祿之家也。五爲王。天子之家也。上爲身。齊家之本也。家人之事盡矣。大抵

家以和集爲慶。故卦體用柔其姤忌多生于婦人。故女取離巽而不用兌兌以陰據陽上爲悅女之邪媚者。其象爲毀折。居下則反家人而爲睽。居上則志不同而爲革。革與睽家人之災也。凡家道索于牝雞。故家人利女貞也。

家人利女貞

家人者一家之人也。一家之人內外男女不同而正家必始于中。中爲卦上巽長女下離中女。閨中无失德而後家人正。故利于女貞也。

彖曰家人女正位乎內男正位乎外男女正天地之大

義也。家人有嚴君焉。父母之謂也。父父子子。兄兄弟弟。夫夫婦婦。而家道正。正家而天下定矣。

家人者。巽離皆女。二離女。四巽女。而皆居內。三五以陽居外。四爻當用位。男外女內。健順之大義正矣。此所謂一家之人也。然必先有家。而後有家人。初上不。在家人之中。嚴君之象。父母之謂也。有父母而後有家人。父正于上。母承于下。而後家人得所。父子兄弟夫婦各盡其情。各安其分。而家道可正矣。人各正其家。而國可治。天下可平矣。然皆始于閨門。故曰利女貞也。

家道莫惡于忤故貴巽男女莫惡于亂故貴明婦子
親暱不患不寬而患不嚴男女不肖不患无嚴父而
患无嚴母家无嚴母則比子弟之惡養家衆之奸亂
内外之別壞幃薄之防父所不及察者惟母嚴而後
家无隱慝故曰家有嚴君父母之謂至哉聖訓乎
象曰風自火出家人君子以言有物而行有恆

離下巽上是風自火出也火爲明風爲順不明不可
以望順家之名分辨而後家之人情順故風火爲家
人君子知巽命之行本乎明德言行其樞機也言必
根諸禮義與子言孝與弟言友而口无夸誕之辭行

必依乎中庸。典自我惇。禮自我庸。而身无詭異之行。言發邇見遠。行出身加民。是巽之風也。有物有恆。是離之明也。本物恆爲言行。是命之順。由于德之明也。君子所爲家人也。

初九閑有家。悔亡。象曰。閑有家。志未變也。

九以陽居初。載之如地。所謂內之嚴君母象也。閑者。門內之木。以防外也。有嚴君以閑于內。則銷萌杜漸。家人之悔可亡。象曰。閑有家者。當家人之初。衆志未變。防之最早。凡家人之變多。始于內。惟主內政者。先知之。爲能潛銷之。至于變成而達乎外。驚乎家衆。控

于上九則未免于悔矣。是以初九爲內君也。

六二。无攸遂。在中饋。貞吉。象曰。六二之吉。順以巽也。

六以陰居二。柔順中正。上應九五。事无專遂。唯居中執酒食奉養得正而吉。苟婦人而務外自遂。家多事矣。詩曰。唯酒食是議。勿父母貽罹。女德之貞也。象曰。六二之吉者。婦无專制之義。順以上從乎巽之九五。此正位乎內之道也。

貞。卽彖辭利女貞之貞。卦爻惟六二女德正中。故以彖辭屬之。傳言巽以順凡三。蒙六五事師之道也。漸六四事君之道也。此六二事夫之道也。

九三家人嗃嗃悔厲吉婦子嘻嘻希終吝象曰家人嗃嗃未失也婦子嘻嘻失家節也

九三居離之終過剛而猛應上九威如故爲家人嗃嗃然恐懼之象傷恩故悔過嚴故厲然禮法肅而內變外患可銷故吉反是過寬則縱婦子嘻嘻然諧笑不謹必有瀆亂之失終至羞吝也嗃嗃之悔始凶終吉嘻嘻之吝始吉終凶嗃嗃嘻嘻皆火象也象曰家人嗃嗃雖嚴未失也苟婦子嘻嘻和而无禮失齊家之則矣

嗃嗃猶煇煇火盛貌詩曰多將煇煇不可救藥嘻嘻

猶謔謔。犬聲。春秋傳曰。宋災。或叫于太廟曰謔謔。烏
鳴于亳社。如曰謔謔。是也。煇煇恐貌。謔謔笑貌。離互
坎之象。九三過剛。不至謔笑。然其德不中。或失過嚴。
爻謂過寬。不如過嚴。爲无失也。卽彖傳家有嚴君之
義。非謂九三嘻嘻也。上九嚴君。三卽婦子之畏嚴君
者耳。中女婦象。互坎中男子象。

六四。富家大吉。象曰。富家大吉。順在位也。

六四陰柔當位。據二實之間。富以其隣。爲巽主。利市
三倍。尊而近君。巨室之象。巽高離明。所謂高明之家
也。以柔承剛。卑而能巽。與陽同吉。故曰大吉。象曰。富

家大吉者。非徒周于財也。家以順爲正。禮曰。父子篤。兄弟睦。夫婦和。家之肥。富之謂也。有巽之德。在四之位。所以富而吉。蓋能順則長保其富矣。

九五王假

格

有家。勿恤。吉。象曰。王假有家。交相愛也。

九五以陽居尊。是爲王家。剛中而應。寬嚴有節。感格一家之人。內外大小咸宜。勿事憂恤。自得吉也。假格通象曰。王假有家者。家人交相親愛。所謂父父子子。兄兄弟弟。家道成治平之始也。其文王之刑于寡妻者乎。孔子謂文王无憂。勿恤之謂也。周公繫爻辭。凡言王多指文王。蓋大妙爲妃。王季爲父。大任爲母。武

王爲子。邑姜爲婦。所以勿恤吉也。

四大吉而五僅勿恤。何也。家道至四而成。卿大夫食祿有采地。家止此矣。四能順以保富。故在家人爲大吉。五則王者以天下爲家。家人不足以盡之。王假有家。言格家人爲格。天下之本。其任愈艱。故云勿恤則吉也。如文王真勿恤矣。成王遭家不造。猶未免于恤。曾不如卿大夫有家者爲无憂耳。

上九有孚。威如終吉。象曰。威如之吉。反身之謂也。

九居上。所謂外之嚴君。父象也。下與初孚。內外各正。以共有家。而上尤以陽居外之極。家人共孚。正已端。

範威如可畏。故居終得吉。蓋家人情勝易狎。以剛在上。尊而不褻。爲一家之表。是終吉之道也。象曰。威如之吉。反身之謂也。父兄躬行不端。責子弟中才。不可得已。故曰。家之本在身。

睽

三三

兌上
離下

序卦傳曰。家道窮必乖。故受之以睽。睽者乖也。人本各異。而合爲一家。外父內母。男女上下。各得其所。故爲家人。若父反居內。母反居外。男卑女尊。則乖戾而爲睽。初自家人上來。在家人終吉。今在睽亦悔亡。父象也。上自家人初往。在家志未變。而在睽則爲猜疑。

母象也。九來居二。卽家人九五交相愛者也。今遇于
巷。六往居三。卽家人六四順在位者也。今見輿曳倒
行。九往居四。卽家人九三嗃嗃者也。今爲睽孤。六往
居五。卽家人中饋者也。今爲噬膚。所以反家人成睽
也。目視不明曰睽。卦體離火在上。澤水下應。其性相
反。上互重離。多視傷明。又互坎損離。坎爲心病。人各
有心。孚則合而疑。則睽莫親于家人婦子。而睽則視
以爲惡人。爲鬼爲寇。或剿之。或射之。苟下能悅以從
上。上能明以視下。則疑釋而爲夫爲宗爲婚媾矣。人
情相疑若此其深。而相合亦若此其易。是以內卦皆

睽而有待。上卦皆反而得應。初喪馬。至四遇元夫而合。二巷遇。至五噬膚而合。三輿曳至上。遇雨而合。合則惡人化爲同室。睽則家人疑爲寇讐。恩怨反覆。變態何常。君子所以无心應物。悅以忘世。不黨同。亦不伐異。蓋天下无久合之同。亦无終異之睽。初九見惡人。避咎悔亡。此獨得處睽之道也。卦體本柔。內以悅而寬其憂。外以明而破其疑。所以始睽者。二女同居也。所以終合者。明而相悅也。卦睽而象皆合。易所以變而不窮也。

睽

窺

小事吉。彖曰。睽。火動而上。澤動而下。二女同居。其

志不同行說而麗乎明柔進而上行得中而應乎剛是以小事吉。天地睽而其事同也。男女睽而其志通也。萬物睽而其事類也。睽之時用大矣哉。

睽垂異也。方在垂異之時。未可圖大事。大事必同心剛中。然後可辦。惟睽則宜柔以合之。濟睽之道。柔則吉。剛則凶。故小事吉也。彖傳曰。睽者何也。離爲火。火動而炎上。兌爲澤。澤動而流下。二物相違也。離爲中女。巽爲少女。女性多妒。同居其志不同行。二人亦相違也。故爲睽。小事吉何也。下卦悅而上卦明。悅而麗乎明。非忿很而昏迷也。卦自家人來。離往居外。柔當

五位非剛愎之主也得中下應九二之剛非上下不相得也。內外卦體皆柔柔爲小居中相得雖睽必合。故小事吉也。究而論之天下无睽不合无合非睽天地本睽而化育之事同也。男女本睽而倡隨之志通也。萬物本睽而羣聚之事類也。當其睽時卽有合之理至其爲用无不合之睽然則睽之時用大矣哉。蓋未合則小事吉既合則大事亦无不吉矣。

家人剛柔各當位故能合。反家人則剛柔皆不正所以爲睽。幸五得中二以剛下應故不終睽然止于小事吉者主弱諸爻皆睽而寡助也。革亦二女同居而

大亨者剛居五柔居二故曰大亨以正睽反是所以
僅小事吉也

凡八卦相錯皆有動象故曰火動于上澤動于下非
變動也大傳曰六爻之動是也

象曰上火下澤睽君子以同而異

火水不同適而其用相資水資火而熒火資水而烹
此之謂同燥濕異質上下異趣此之謂異聖人與人
同耳然跡混而行孤外樸而中炯涇渭必分可否必
辨猶水火相濟卒不相雜也是故樂同而八音異乃
叶食同而五味異乃調因異爲同以同劑異天地聖

人所以爲睽之道也

睽窺也。火高而澤深，火明而水暗，有疑而窺視之象。君子不能使天下皆知已，亦惟其同而異也。然不曰火上澤下，而曰上火下澤者，澤欲上于火，火欲下于澤，猶履之言上天下澤，有將交之象焉，所以爲同而異也。

初九悔亡，喪馬勿逐，自復見惡人，无咎。象曰：見惡人以辟咎也。

目視不明曰睽，疑則生睽。有疑不釋，所以終睽。初爲睽始，決疑貴初，以陽居初，得正故能自克，其體爲悅。

故能善處而悔可亡。與四敵應。四互坎爲險。爲馬。卦體求合而上行。有遇險喪失其馬之象。馬方逸而逐。逐則愈逸。但勿逐。其馬自復。二以上互爲噬嗑。四居中互坎。有凶惡之象。坎爲盜。四體爲火。初體爲澤。敵應相克。故初視四爲惡人。然初能悅而往。見自可无咎。蓋安常處順。无以待天下。何睽不合。所以悔亡也。象曰。以惡人爲不可見而避之。將終于睽矣。初不以避爲避。而以見爲避。避爲咎。則不避爲无咎。所以終合也。

卦所以睽者。兌反巽。居下也。故爻象在下則睽。上行

則合離柔而明以水從火則味出以金從火則器成
悅以應明天下无不可合之人矣

初在家人居上反身威如正家之主父之象也故能
盡處睽之道若上九睽孤多疑則婦人之恆態耳所
以在家人爲母

九二遇主于巷无咎象曰遇主于巷未失道也

九二在家人居五下應六二爲王假有家交相愛者
也今來居二處睽之時故爲遇主于巷巷者偏曲之
處不當位之象然得中而其體悅五以柔居尊下應
雖不當位亦无咎主謂六五昔在家人二亦嘗爲主

故爲遇主之象。象曰：遇主于巷者，二能絀其剛，紆其身以從于君，悅而得中，未爲失道。處睽之時，固宜委曲如此。是以坎四納約自牖，睽二遇主于巷，所由非正遭逢，不得不爾也。

六三見輿曳，其牛掣。微其人天且劓。藝无初有終。象曰：見輿曳，位不當也。无初有終，遇剛也。

六三在家人居四爲巽，今來居三爲兌，陰柔不中正，上下易位而爲二卦之主。又進互四爲坎，退互二爲離，當睽之交，心疑目眩，見若乘輿者，牛曳之而上，其一牛又掣之而下，車中之人倒首向天，若劓其鼻者。

然剝割鼻也。兌偶上缺，毀折之象。離目爲見，爲牛。互坎爲輿，爲曳。重離爲兩牛。上牛曳之下牛，掣之。蓋三本陰柔，反來居陽。本巽主在上，爲家人。反下主兌爲睽，故有此象。然有應在外，悅而能明，初睽終合也。象曰：見輿曳者，陰居陽不當位也。无初有終者，外有正應，遇上九之剛也。

一陰之卦，惟兌以柔乘剛，有小人踞侮之象。澤體含垢，少女狎邪，故凡兌六三爻象多險怪。睽所以反家人者，徒以兌兌所以反巽者，徒以三故。傳云：位不當以咎之。大抵家人情睽，則多疑。疑則所見无非險怪。

可愕之事其象如此家人合則心定身安烏有顛倒牽掣之疑

九四睽孤遇元夫交孚厲无咎象曰交孚无咎志行也處睽利用柔九四陽剛下无正應故爲睽孤與初九敵應初始爲元陽剛爲夫故爲遇元夫初以澤在下當睽始其見未明疑四爲惡人及其避咎相見亡馬勿逐回能明而以爲元夫遇而交孚矣剛而无應未免于厲旣與初孚亦可无咎象曰交孚无咎者未與初遇則四失位孤立二陽旣孚悅而能明同德相助可以行其志矣

家人睽不以離以兌也。故爻欲往合在兌不在離。初爲澤四爲火。雖不相得而就下。炎上各安其位。未至相息。火性不能下。澤水可挹而升。故初能悅。則四能明。初避咎而往。則四以爲元夫而交孚。水火相濟之象在五行水爲天一。故曰元自家人來。故曰夫。

六五悔亡。厥宗噬膚。往何咎。象曰。厥宗噬膚。往有慶也。六五在家人居二。今居五成離爲卦主。厥宗卽五也。二剛之間曰宗。離體相親麗之稱。膚肉无骨也。噬膚言柔而易合也。離爲庖厨。卦體自二以上似噬嗑。又五自中饋來。故有噬膚之象。五居尊得中。柔順易合。

九二剛中在下以此往應何咎之有往謂二往五也
睽象往上則合反下則睽何咎言不終睽也象曰厥
宗噬膚者六五居中柔順九二往應則合可以成巷
遇之交无睽孤之虞而相悅以慶也

離麗也其體善合難睽故稱宗如同人之六二稱于
宗亦離中也二以剛中下應君臣相得卦睽而能合
者正以五柔中爲主也彖所以謂小利貞

初稱見惡人二稱遇主三稱見其人始睽之象也四
稱元夫五稱宗上稱婚媾終合之象也卦本家人來
故合則稱夫宗婚媾焉

上九睽孤見豕負塗載鬼一車先張之弧後說脫之弧
匪寇婚媾往遇雨則吉象曰遇雨之吉羣疑亡也


上九在家入初爲母處睽之極以離互離重明亂視
互坎亂離與三爲應而皆不中正處睽多疑亦爲睽
孤離爲目疑情妄見下視三互坎在澤疑爲豕負泥
塗坎爲豕兌澤爲泥塗坎隱爲鬼爲盜爲弓輪睽爲
弧矢以與曳牛掣爲載鬼滿車欲張弓射之已復脫
之始悟三非盜是已婚媾也惶惑如此睽疑好察之
過耳然三柔而能應悅以麗明猜疑釋而陰陽合往
遇雨吉矣坎爲雨天下本无事徒以妄見生疑積疑

成睽。苟行所无事。則羣疑盡銷。如初九喪馬勿逐。見惡人。奚睽之有。故家人睽存乎父母而已。象曰遇雨之吉者。雨則陰陽和。和則疑解而睽可合矣。

周易正解卷十一終

周易正解卷十二

蹇



艮下
坎上

序卦傳曰睽者乖也乖必有難故受之以蹇蹇者難也睽與蹇雖不相對而亦相似睽上本離二四互離亂明目不能見故為睽蹇上本坎二四互坎重險足不能行故為蹇蹇所以繼睽也睽蹇皆世所忌聖人憂患作易皆以名卦而贊其時之太辭危而意遠矣卦取諸坎艮何也造化以陽為本蹇陽蹇也坎陽陷也艮陽止也坎位北艮位東北天氣由北而東而南而西日月東生西沒天之行也今內艮外坎自東而

北背西南而逆天行。所以爲蹇。故聖人教人出蹇之鄉。先坎後艮。行向西南。水遇高則險。就下則平。山水則蒙。水山則蹇。雷水則解。天下之事。順天循理。雖羊腸九折。皆爲康莊。逆天悖理。東西南北。无非險道。故曰。君子居易以俟命。小人行險以徼倖。居易者。利西南之謂。徼倖者。不利東北之謂也。然西南謂之易何也。西爲兌。西南爲坤。南爲離。卦皆陰柔。陽道亢厲。陰道卑平。天尊而地親。天不可階。升而行地。則无疆。西南含弘光大。故解蹇利也。坎艮二體皆坤。九三以一陽來爲艮。九五以一陽來爲坎。故六爻之象皆未脫。

蹇九以陽居五。四與上共陷之。四既陷五。將下連二。三爲重坎。三艮止不上。二中正與三同體而應五。互爲離火。四重坎不成爲五。三兩陽所制。二乃得以其明與初上諸陰赴之。坤氣始勝而西南至矣。故蹇解二卦爲梗。莫如六四。非九五剛中之主。九三陽剛之助。與六二初上諸君子朋來之力。烏能遽濟乎。夫以一小人作難。羣賢協力。尚未底平。直至解終射于高墉。小人之禍易蔓而難圖。文王以崇虎之譖囚于羑里。四友諸臣同心以免于難。返爲西伯。乃滅崇。周居西南。紂居東北。其象如此。坎坑也。艮很也。故東北爲

蹇坤順也。離麗也。故西南爲晉。不晉所以爲蹇。坑而
很。獨夫之惡也。麗而順。君子之善也。文王豈弟君子。
所以爲西南之主。紂之不善。所以爲陷很之夫。造化
人事物理。惟平易爲可近耳。

蹇利西南。不利東北。利見大人。貞吉。

蹇難進也。上坎下止。險而止。故難進。自艮適坎。行當
東北。轉而西南。順天時。行則无蹇難。東北陽長。壯實
而亢厲。西南陰消。卑下而平坦。天道人事一也。然必
有陽剛中正居尊位之大人。乃可以持危守正得吉
也。

恆情好上而惡下。好進而惡退。好盈而惡虛。世路所以多危險。驅而納之陷阱。莫知避也。東北陽方。陽道常盈。進而上行。西南陰方。陰體常虛。退而下降。知者處世。盈不如虛。進不如退。上不如下。蹇所以有利。西南不利。東北之象。

彖曰。蹇難也。險在前也。見險而能止。知矣哉。蹇利西南。往得中也。不利東北。其道窮也。利見大人。往有功也。當位貞吉。以正邦也。蹇之時用大矣哉。

蹇者難也。坎居上。險在前也。艮止于下。其道光明。知者見險而止。故謂之蹇。利西南者。西南坤位。九五以

陽居坤得中爲坎水。宜往西南長養之鄉也。不利東北者。坎險在上。艮止在下。道窮而爲蹇也。利見大人者。九五居上之中。往至西南。則朋來蹇平而有功矣。貞吉者。大人當五位。居坤守正得吉。以濟難而正邦國也。然則蹇之時。正大人撥亂反正之會。君子興衰致理。安邦得衆之幾。其用豈不大哉。

坎居北。爲雨。遇艮止。西南路塞。萬物未出。雨无所施功。故蹇結而不解。反艮出震。西南路通。雷雨交作。物齊于巽。相見于離。養役于坤。故水氣運化于西南。蹇化而爲解也。

象曰。山上有水。蹇。君子以反身脩德。

山上有水。行向東北。艮自下視坎。水在上也。水由地中則平。懷山則險。艮止不往。故曰蹇。君子觀象往而蒙難。不如反而脩德。德脩身正。天下歸之。履道坦坦。无地非西南也。思不出位。君子所以艮背。故爲反身。常德行。君子所以習坎。故爲脩德。

免禍莫如知止。險而止。可謂智矣。然不反身脩德。天下何處无險。是以險則不往。來則脩身。不以遇險而歸罪于人。不以能止而諉責于已。卦爻皆有反象。故君子反身。

初六往蹇來譽。象曰：往蹇來譽，宜待也。

六爻謂往蹇者，趨坎也。謂來者，艮止不進也。自艮往坎，由東而北，自坎來艮，反向西南也。初爲蹇始，往則遇險，其體本艮，來則獲譽。譽與豫通。詩云：韓姑燕譽。又曰：是以有譽處。初去險遠，不往則安。象曰：往蹇來譽者，宜待。六二九三諸君子先也。自坎適坤，六位之初，正應坎，坎爲亟心，故象爲宜待。

天下之事，不在其位，則不與其難。初不當用位，故宜靜以待。濟則共濟，不濟難亦不及。與遯初六不往，何災同艮，其義一也。是以君子居不辭下。

卦以艮錯坎自東往北爻義欲轉向西南故象皆以
來爲往爻雖上往卽往是來辭雖言來來卽是往卦
不必變爲西南而爻象皆往西南故至五上愈吉抵
西南之象也解彖辭云其來復言言旣來西南也蹇
終西南後成解

六二王臣蹇蹇匪躬之故象曰王臣蹇蹇終无尤也

六二陰柔中正上應九五故爲王臣五在險中二在
止中志切勤王而進互重險蹇蹇然不得前艮不獲
身故爲匪躬言非爲愛身之故也爲險難不能進耳
象曰王臣蹇蹇犯難急君柔順中正不迷西南之往

朋來共濟終有利見之期不至于過亢也以往西南之位計之此正應艮艮爲徑路爲小石蹇蹇之象爲闔寺王臣之象

六二陰柔故忠順有餘乏獨濟之才必西南得朋然後可濟時方在艮故爻有匪躬之疑傳有无亢之釋至三四始互離五始當離位上始抵坤乃達西南三四解蹇二方在蹇

五以君在險二以臣急君初三上皆與二同心助之惟六四一陰當上下結之二捐軀蒙難力不能進義不可退故爻獨不言往來困頓守死執節不屈所以

感激羣情來諸賢之助也。故在蹇仗義執節莫如六二。九五爻辭云朋來指二也。傳云中節二得中執節五所以濟也。

九三往蹇來友。象曰往蹇來友內喜之也。

九五以陽爲排難之主。六四以陰爲成險之小人。六二以陰爲救蹇之忠臣。九三以陽爲濟蹇之智士。蓋三本重剛有應在上進與險遇間于陰柔故爲往蹇使六二不中正外與四互則三亦在坎中矣。然三爲艮主其道光明欲來西南內與二爲體見險不進遇陰不比而來友反則與二同心。六四承乘皆剛互爲

離火以破坎四失險而小人計窮九五得濟九三所以大有功于五皆六二同心之力也向非六二中正匪躬九三止不進可也安望往而復反乎此解六五所謂君子有解小人退者也故象曰往蹇來反內喜之也內指六二喜之若曰三來吾事濟矣以往西南之位計之此正應震震笑言有喜象大抵二以柔應五三與二同體故三助二亦以助五上以柔應三五與上同體故上應三亦以救五此五所以終獲朋來也

六四往蹇來連象曰往蹇來連當位實也

四爲險始。坎雖二陰。然水陷上。由坎在下也。四陰柔
險之至也。連結也。上下之交有連結之象。往則爲蹇。
以陷五來則連。二以陷三乘三在下。連二爲重坎。故
爲往蹇來連。然无如三與二同心。知止何也。象曰。往
蹇來連者。六四以陰當位。爲險逼尊。据二實之間。實
則水不下流。其險深。故連爲重險。然三與二同心不
進。則四反麗于兩實之間。離見而坎衰矣。小人陷人。
適足自焚耳。離南漸。西卦所利也。以往西南之位。計
之此正應。巽爲繩。故有連象。

連者內外連結。與解正相反。解六五曰。君子惟有解。

則是小人惟有連也。六四之爲小人明矣。解云：負乘致戎，獲狐射隼，皆指六四。傳云：當位實，所以發其反側之奸。本柔居柔，近五用事，介于兩實，所以媚四結二而陷五也。或以四爲君子，然則蹇誰爲之與？蹇蹇救五者，二之志。二與三同體，故三之同心莫如三。三與四同功，故四之所忌莫如二。三與五同功，故三之所急亦惟五。

九五大蹇朋來。象曰：大蹇朋來，以中節也。

九五陽剛中正，以居尊位。當蹇之時，獨立險中，陽大故爲大蹇。六二以王臣赴難，九三反內，六四來連之。

計解二與初西南朋合。而蹇始通矣。朋謂六二。象曰。大蹇朋來。九五剛中。處險不困。下應六二柔順中正。蹇蹇赴難。執節不回。是以遠邇響應。西南朋來。向非六二履中。仗節。烏能拯主于大難乎。以往西南之位。計之。此正應離南面之象。進卽爲坤西南之鄉也。五與三同功。下互離火上炎。以化坎直通坤方。西南得朋。故五曰大曰朋。六曰碩碩亦大也。皆坤象。

上六往蹇來碩。吉利見大人。象曰。往蹇來碩。志在內也。利見大人。以從貴也。

坎本坤體。六以陰居上。是爲坤終。西南之鄉也。卦初

自西南來至此與東北懸絕水落山平寬大之地故六爻至是始出險外其占始吉利見大人者九五居中背坎向離大難已平向明而治人共見之也象曰往蹇來碩者上无所復往下應九三同志在內以急君也利見大人者以陰柔從九五之貴也如上六正所謂西南之朋矣

解

三三

坎下震上

序卦傳曰蹇者難也物不可以終難故受之以解解者從容舒緩之意蹇難急迫反蹇則舒緩而成解蹇以艮錯坎自東之北所謂山上有水不利東北也解

以坎錯震。自北轉東。所謂雷雨作。利西南也。反東北而東南。倒坎艮而震。坎蹇。所以得解。解所以反蹇也。六爻之象。亦自坎歷震至坤。患難初定。撫綏休養。西南平易。可以久安。然九二田獲狐。上九射隼。何也。奸邪不戢。善類不伸。則蹇難終不銷。雖行西南。坤順之鄉。不廢東北。震坎之令。雖赦過宥罪。而田中之狐。墻上之隼。必獲。所以畢解之功也。在蹇之日。狐隼負乘。依東北作梗。在解天時。向日王路。平康妖邪計沮。故取无不獲。蓋凡國家之難。其作也靡不由小人。而其解也靡不由君子。人主欲避東北趨西南。親君子去

小人而已矣

解利西南无所往其來復吉有攸往夙吉

解者散也遇險而止止在險內則蹇當險而動動在險外則解矣蹇不利東北解蹇故利西南既至西南坎水流通萬物致養宜安靜以俟之蓋坎水生物至西南而功成无所更往坤道含洪故其來復吉然天運循環坎水歸北將復東出今遇震在外是又將有所往也一陽已升西南路通宜及早行遲則雷將作而雨不至失解之會矣故夙吉夙早也坎適震而隔艮故趨震宜早坎爲子一陽初萌去震尚遠月令仲

春雷乃發聲。坎氣不至。則雷不發。仲春行冬令。陽氣不勝則菑。故坎行宜早。于半陽生。仲春雷雨作。而後百果草木因時解拆。故有夙吉之象。

蹇爻象亦西南行。但在蹇以來爲往。背坎艮往也。解往西南。則順卦體。由坎適震耳。

彖曰。解。險以動。動而免乎險。解利西南。往得衆也。其來復吉。乃得中也。有攸往夙吉。往有功也。天地解而雷雨作。雷雨作而百果草木皆甲拆。策解之時大矣哉。

所謂解者。坎自蹇來下。而震動于險外。免乎險矣。故謂之解。利西南者。蹇以西南得解。西南坤方。坤爲衆。

含弘光大足以容民得衆宜往也其來復吉者九二以陽居坤得中爲潤物之主道行西南長養故吉也有攸往夙吉者陽萌于坎由坎趨震順天時行往有生物之功也震雷也坎雨也雷雨者天地陰陽交構之氣解釋而作也雷雨作則百果草木之孚甲堅固者皆拆裂萌生造化品物皆賴解以發育其爲時豈不大哉

象曰雷雨作解君子以赦過宥罪

雷雨天地所以解散屯結之氣發生萬物者也君子觀象以好生爲心于小過赦而釋之有大罪宥而寬

之以宣其沈鬱達其冤滯。君子之解也。蹇平新國宜用輕刑。小人之爲狐隼。法所必討。從輕而已。當其蹇也。脩德以反已。及其解也。赦宥以恕人。君子濟難之道如此。

初六。无咎。象曰。剛柔之際。義无咎也。

初自蹇上來。出蹇入解之始。地違東北。坎險已平。外有應援。何咎之有。象曰。所以无咎者。以陰居初。上應九四。剛柔相接。四以剛正爲解蹇之君子。初與之接。義无咎也。

蹇坎在外。艮止于內。水不得就下。汎濫東北。象傳謂

當位實是也。解坎在下。動在外。水動則流。而又適震。西南順下。初與震主正應。何咎之有。爻辭不言所以者。初卽蹇上。四卽蹇三。剛柔正應同也。

九二。田獲三狐。得黃矢。貞吉。象曰。九二貞吉。得中道也。九二以陽居中。爲坎主。在解行西南。水由地中。互離火在地上。有田象。坎爲狐。陰物也。指六三。故爲三狐。黃中色。矢直物。姦邪去。直道伸。九二中立。有此象。以往四南之位。計之。此正應艮。艮亦爲狐。蓋九二雖來復。猶在坎中。陽不安險。與四互離。制三之坎。故爲獲狐之象。田獲以網罟。離象。坎爲弓。離兵爲矢。雖在險。

中而陰不能爲陷。初外應而三被獲失險。故二居中得貞吉。彖謂來復吉是也。象曰九二貞吉以陰不能陷。其來復適得中之道也。得中道猶言不失所。卽得黃矢之得。

六三負且乘致寇至。貞吝。象曰負且乘亦可醜也。自我致戎又誰咎也。

六三在蹇四爲險。今來三以陰居下之上如負販賤夫背負物而身乘軒小人在位貪鄙之狀使盜賊見而生劫奪之心蹇所由作也。彼方自以爲正何羞如之。陽實在上有負象坎爲輪輿爲馬有乘象爲盜有

月二角 卷二 十二 正
寇象上下皆陽有負且乘之象外互重坎爲致寇之
象象曰負且乘小人之態亦可醜也自我與戎又誰
咎也以往西南之位計之此值震故有乘馬在塗之
象

爻言致寇傳言致戎何也寇害及身不足爲小人惜
寇至興戎禍且及國一夫作難世運遭蹇惟小人之
故此六三之罪赦宥不及也故傳曰自我誰咎

六三陰險小人據非其位在蹇戴五履三在解戴四
履二爻不言承戴而言負乘負者肩任傭賤之事負
則宜履而且乘乘則宜戴而又負甚言不稱以醜之

爻于六三可謂深惡矣。蓋其往來二卦當上下內外之交。在蹇連下陷上。爲九三所止。在解致外陷內。爲九四所震。妖如狐。疾如隼。行如寇。盜賤如趾。拇其鄙之也。如此而說易者。猶謂蹇六四君子。謬也。

九四解而拇。

母

朋至斯孚。象曰。解而拇。未當位也。

四爲動始。雷發聲。則勾萌蟄啟。故爲解。震爲足。三附足有趾。拇之象。將與四互坎于外。猶在蹇之來連也。四震陽上遂。不與險比。故爲解。脫其拇之象。朋指初六與四正應。四往西南。初六以陰偶爲西南之朋。陰陽合而後雷雨作。故曰斯孚。象所謂往夙吉。此也是。

以解蹇之功。九四居多。象數然也。象曰：解而拇者，九以陽居四，六以陰居三，未爲當位，不當位，故不相得。未如在蹇當位實，可以來連也。蓋小人之爲蹇也，因當位而夤緣，因不當位而解散。此四所以得脫然上行也。以往西南之位計之，此應巽陰陽之交也。巽爲躁卦，有待朋不至之象。

四與三上下原不同體，而三甘爲四拇者，小人爲人下走以求親附也。九四震陽剛斷，霹然決裂，不顧而去，其爲解之功大矣。驅邪之威，莫如雷霆。傳謂不當位何也？小人爲蹇，惟于內外上下之際，善連結耳。所

以連結者。由彼此各當位。然後得行其夤緣之術。故蹇中四爻皆當位。而六四適在兩實之間。今居三。雖負乘兩陽。位皆不當。小人思納交。而支離疎濶。勢自不得不解。傳于此言未當位。以反蹇之當位。小人之情態盡矣。

六五。君子維有解。吉。有孚于小人。象曰。君子有解。小人退也。

六五以柔居尊。乘震陽九。四以剛承五。動出險外。九二剛中。內應與四。互離。獲三狐。以破坎。二陽同心。輔五解蹇之功。臣也。故爲君子。惟有解。所以六五安然。

无事于險難之外而吉也。六三小人以柔爲險。在蹇
爲來連之計。至是謀窮自悔。是君子之威德孚化之
也。象曰。九二九四陽剛。君子有解蹇之功。六三小人
失計而退。解道斯成。正西南雷雨作之會矣。以卦位
計之。五正應離。故有明辨之象。離爲網罟。結繩。故有
解象。

君子小人獨于五言之。五爲君位。解至五成。五所以
得爲解主。君子之力也。國家之難。衆君子解之不足。
一小人結之有餘。用人不可不慎也。小人指六三。君
子之功。九四爲多。在蹇居三。爲艮主。以止險。使小人

不得下連在解爲震主以出險使小人不得上附故
曰惟有解言在蹇在解處三處四无往不解也夫以
蹇六三之奸險君子解之不能卽去惟曰有孚如否
六三之壅蔽君子休之不能卽決惟曰包承易道寬
裕從容不過剛如此文王所以爲文也

上六公用射隼于高墉容之上獲之无不利象曰公用
射隼以解悖也

以六居上正西南坤位解之終動之最順者小人飛
揚急疾之奸能擾攘于離亂之會至大難旣平天路
清夷其計自窮明主在上從容發姦故爲公射鷹隼

于高墉之上獲之。則戎首伏辜而禍亂未寧矣。故曰
无不利。象曰。公用射隼者。下獲六三。狂悖之奸也。昔
扼主于四。今負乘于三。二以爲狐。四以爲母。上以爲
隼。下拑之上。角之。元惡殲而蹇難除矣。使不就西南
彼負隅得肆。寧有極乎。

上爲公。坎爲弓。互離爲矢。六三在互離之中。離爲鳥。
有隼象。震爲決躁。有射隼之象。二乘初。似巽爲高。三
在巽上。有隼集于墉之象。築土爲墉。坤象。三上相對
有射象。

小人急疾往來。徵逐有鷹隼之象。當解之終。人情緩

散集于高墉。將有脫條離鞬之象。上下失勢。有孤栖
无侶之象。故射獲之射者。正直審固。君子反身脩德
之象。蹇難初解。戒于張皇。故彖云來復吉。象云赦過
宥罪。是以爻不若他卦征伐用師。鷹隼小醜。一矢之
力耳。罪過有赦宥。而小人必不可不除。故爻辭諄諄
焉。孤小人之邪媚者也。拇小人之傭賤者也。隼小人
之貪鷙者也。皆指六三。卽蹇六四也。

損

三三

艮兌
上

序卦傳曰解者緩也緩必有所失故受之以損人情
蹇難急迫惟恐失之故常无失從容解緩則驕情生
而損失因之失復求得損益所以繼蹇解也損之義
有二一以減少爲義斷緣省事寡欲清心之謂也一
以虧敗爲義傷財病民毀廉喪節之謂也能寡欲清
心自不至毀廉喪節故或以損而損或以損而得益
或以益而益或以益而反損是以聖人設卦以損下
益上爲損以損上益下爲益物以下爲基道以卑爲
本惟下不可損泰則不得不損而益在上則稱損惟

下爲當益。否尤不可不益。而損在上。則稱益。人皆知損而不知損益。人皆知益而不知益損。故序卦先損後益也。事先簡而後繁。禮先儉而後奢。物先不足而後有餘。是故君子先損。損兌益艮。所以爲損。兌悅艮止。所以終不欲損下也。損不損下。是以不損爲損。以不損爲損。是爲廉貞。廉貞是爲損益。寡欲清心之道也。初九重剛可損。六四弗受。二中弗損。五中自益。三損九以成悅。故上弗再損。蓋下損一則悅。上益一則止。下悅而上益。上止而不損。彖所謂有孚元吉此也。下不得不損者。造化裒益之理。卦已損而爻不復損。

者已取諸天而不復求多于人。也。人生五官四體取諸造物多矣。于其中又取盈焉。莊生所謂不受天損易。不受人益難。夫已簡之而不得所簡者。此也。故二卦爲人事裒益之要。上經三十卦首天地。自乾坤而下。奇偶各三十而當否泰。下經三十四卦首男女。自咸恆而下。奇偶亦各三十四而當損益。否泰者。天地之小闔闢。泰交而否不交也。損益者。男女之否泰。損不交而益交也。方其咸也。二少交感。損則女悅而男止之。懲窒之義也。方其恆也。二長正位。益則男服事而女助之。遷改之義也。損男莫如女。而男止則損損。

之權在男也。益女莫如男。而男動則益。益之權亦在男也。造化之機。宰于陽。而損之益之存乎人。昔人云。貴不如賤。富不如貧。益不如損。君子思遷善改過。不如懲忿窒欲。思爲聖賢。不如勿爲不肖。思養生。不如勿傷生。天運无日不來。卽无日不往。來所以致其往。人生无日不長。卽无日不消。長所以致其消。是故損益相乘也。損不善則至于善矣。損之又損。益之道也。損有孚。元吉。无咎。可貞。利有攸往。曷之用。二簋可用享。損者。減少也。凡物彼有餘而浸減。此不足而補之。人已相得。彼悅非強。此止非貪。去浮淫而存本真。故爲

有孚。斯則欲寡心清。求少易足。元吉之道。可以免咎。
可以守正。可以利所往。故道莫善于損。凡不可損者。
爲欲用之耳。何之用哉。二簋雖薄。可以薦鬼神。羞王
公。所貴在孚。奚以多爲。故寡欲存誠。莫善于損。人情
所憂虧缺不足者。正君子所惡于盈而欲自裁者也。
○兌爲口。震爲足。互坤爲腹。頂踵實而腹虛。有簋象。
簋似籩而上爲鬼形。古以竹爲之。故字從竹。震象也。
從艮。鬼象也。下重奇。二簋之象也。艮爲門闕。震爲帝。
二奇在下。有二簋用享之象。

彖曰。損損下益上。其道上行。損而有孚。元吉。无咎。可貞。

利有攸往。曷之用。二簋可用享。二簋應有時。損剛益柔。有時。損益盈虛與時偕行。

所謂損者。卦自泰來。三陽泰實。故損九三爲上九。其道上行而下受損。故曰損兌爲毀折。有損象。六爻皆應下悅乎上。上止乎下。止悅相承。山澤氣通。故爲有孚。損而有孚。則敦本尚實。大善无咎。可得正而利有所往矣。人之不損。欲以何用。二簋雖薄。可以用享。夫豈在多。亦顧其時何如耳。時可損。二簋非薄。時不可損。損反益貪。故損者悅而能止之道。非謂剛可盡損。柔可多益也。盈虛消息與時偕行。損不以時。則上專

而下苦。安能元吉无咎。可貞利攸往乎。

損之言省也。簡約之名。卦取損下益上。爻取損剛益柔。以象損耳。義不主益。而以能損爲德。以剥下爲貪。故彖曰。二簋可用享。蓋損者損其泰也。卦本地天。泰物不可以終泰。泰甚也。乾在下甚實。故宜損。乾實莫如九三。故損三以益上。則下成悅。而上成止。上止不可再益。下悅不可再損。故彖傳曰。損剛益柔有時。時者中也。耳目不可塗。視聽不可塞。懲其忿窒其欲而已矣。下已損更損。則將爲枯槁。上已益復益。則反成貪黷。故損者清心寡欲之要。非剥下奉上之謂。爻初

九已事而遄往六四損其疾不受以此也卦體二少
相得悅而卽止以損其淫欲也互頤在上損其嗜味
也互歸妹在下反漸損其躁妄也互復在中不遠復
以存仁爲本也離體居上澤體居下水火得位也陽
在下澤水盛而不漏陽在外山氣充而不洩坤內藏
黃中通理而有孚在中所以損爲盡善益不如也下
經首咸恆中損益旣未濟爻辭變而應之有旨哉
卦損爻義貴弗損亦猶泰不主泰否不主否同人不
同謙不終謙剥不終剥復不終復咸不主感恆不定
恆大壯不用壯睽不終睽夬不貴決之類易道尚變

如此

象曰山下有澤損君子以懲忿窒欲

山高澤深澤在山下是損澤以益山故爲損君子觀象思天下本无事有深澤則有高山惟損爲善故忿怒之突起如山懲之使平慾竇之滲漏如澤室之使塞不見可欲不見可怒損之又損澹然平易和氣滿腔君子之山下有澤也養德養生皆不外此

損忿怒以養氣損情慾以養血養生家襲爲水火升降之說下澤爲水二以上似離爲火澤水欲象也離火忿象也艮山懲窒之象也分澤水而上以制離遏

離火而下以煉澤初上皆剛上不飛騰下不漏洩山澤之氣往來交蒸而興雲雨術家稱為還丹附會于此

初九已事遄往无咎酌損之象曰已事遄往尚合志也

以陽居初本自有餘在下爲民上與四應事謂奉上之事已止也卽損義遄速也損貴初而遇四以艮止初之事初悅以終事速往不已于義无咎四互震爲決躁遄往之象爲斗初澤爲水艮爲手有酌四之象四陰柔有虛餒之疾而酌以養之也悅而止其損无

多故曰酌損象曰四止其事而初必遯往者四之志不欲煩民初之志不肯負上所謂上好仁下好義悅以應止故曰尚合志尚與上同

損乾爲兌則損體已成遂止不復損是爲已事之象莊生云簡之而不得夫已有所簡矣卽此意已事猶省事成損之主在三上而任損益之事者亦惟三上故初與二不任損四與五不任益然初欲益四者何也其體本悅以陽居陽太實又不中欲以財爲悅因四陰虛往濟之亦仗義之事也如後世富民輸財助官要非中道若九二得中自不任損矣

豳詩云九月肅霜十月滌場朋酒斯饗曰殺羔羊躋
彼公堂稱彼兕觥言秋成農事畢以羊酒酌獻其君
卽此爻象兌爲正秋爲羊澤水爲酒初往四變互坎
爲酒食互震爲斗互頤爲口食艮爲宮闕互震在中
爲君互坤爲衆爲朋蓋因彖辭二簋用享故初爲酌
象也已事謂正秋事畢初本獻五而非其應五處損
不受益四爲艮始故應而止之

易卦自謙而後爻象之吉鮮有如損者蓋謙繼同人
大有而損繼蹇解處盈之道惟謙爲順多難之後惟
損爲悅皆以止爲本故大學至善莫要于止養心養

身不違此

九二利貞征凶弗損益之象曰九二利貞中以爲志也
二得中不容損故利守正以剛居柔自无可損上應
六五損已往益則失中而凶蓋二本中損則不及五
亦中益則大過故爲弗損益之益之謂益五五自有
益不必二也二往益則卦變爲益反卦德凶之象也
象曰九二利貞吉者以執中爲志不以益上爲志與
初異也

五受益而非損自二也上益五而非損之已也故皆
曰弗損益之象傳云損益有時時卽中也得中則止

故卦本損下二在下不受損以中也五爲損主不損下亦以中也然五不言弗損何也二陰虛虛故无可損五陽實實自得所益五之益非損下爲益以能止爲益故无損于二若二之弗損无可損非止而不損也故亦不受益本无可損而不損者不足貴可以損人而不損自益者乃爲盡損之道也是以五稱元吉凡在下者不宜太損損則過卑在上者不宜太益益則過高如人身耳目口鼻求益之物皆在上手足四肢塊然无知任毀折之事者皆在上下下爲悅以供其求而上爲艮以止其貪下欲損而不與其損上求益

而能止其求如是則下自无損上自日益損所以爲益也人不患不益而患不損使二搏攫採取以益五則五反受其斲喪爲損多矣何益之有此五之益不在損二而在受止以損下爲損則損爲清約不以益上爲益則益爲富有可以知損之義與時中之道矣六三三人行則損一人一人行則得其友象曰一人行三則疑也

卦體本泰乾在下三陽同行九三尤爲重剛而損以爲柔故爲三人行則損一人三往爲上九六下來居三爲正應是爲得其友兌象象曰必一人行者三

則疑也。凡物理一則招益三則招損。道者一陰一陽而爲兩也。物以兩化。三人行損一人者損爲兩也。一人行得友者得爲兩也。蓋无獨不對。故一必有二。二偶零一。故三則爲疑。凡物二曰友三曰羣。羣故生疑。詩云或羣或友。

三爲人位。故象人人三爲衆。互坤之象行互震之象。然卦體本坤乾六爻皆應。何待三上交易而後爲相與。蓋三上不交則不成男女。九三往而生少男。六三來而生少女。有男女交合之象。故夫子大傳以天地絪縕男女構精釋之。

凡物益彼必損此。損乾爲澤。益坤爲山。山雖增高。澤亦增深。澤悅以損。山止其益。損而无損。不益而益。造物乘除之妙理也。故象以懲忿窒欲。天地男女交感。當之術家。因爲男女鼎器之說。宣淫導慾。以爲脩煉。叛道罔民。莫此爲甚。

六四損其疾。使遄有喜。无咎。象曰。損其疾。亦可喜也。

四爲艮始。以陰居陰。有偏弱之疾。下應初剛。悅以遄往。四以艮體止其事而不得。乃自損除其疾。使遄往者有喜。寡其所求。不欲損下。于義无咎。初往益四。則四互成坎。爲心疾。故有疾象。艮止其益。有損其疾之

象遯震象喜。兌象象曰六四陰柔有疾而能自損其疾則初之遯往者亦可以喜悅矣。蓋損其疾則可无。用下之益。使遯往者喜。又不拂乎悅之心。此可以損下而不損者也。

四乘悅當上下損益之間。所謂物交物之際也。孟子云。飢者甘食。渴者甘飲。飢渴害之也。我誠无飢渴之疾。外物安得而益之。四本止體得正。故自損疾不受初酌。所以爲无疾有喜也。

六五或益之十朋之龜。弗克違。元吉。象曰六五元吉。自上祐也。

六五以柔居剛。其體本止。下與二爲正應。二中不可損五中。不待益上。承艮陽外止而內明。故爲或益之十朋之龜。離爲龜。卦體中虛。有離之象。靈知中藏。臧否自決。有忿思懲。有慾思窒。故爲弗克違。不損下而自損。不求益而自益。彖所謂有孚元吉。此也。蓋五雖尊位。成損之主不在五。而在上。上受三之益而推以益五。五非所益而得益。故曰或益之。自外之辭也。卦損三益上。而爻五受益。故傳曰上祐。猶益卦損四益初。而二受益。曰自外來正相同。上自乾往。有天象。自上祐言。若自天祐也。祐助也。此益之无俟于損下者。

也

卦體悅在下有巧令上進之象明主靈龜上止何畏乎孔壬堯舜所難故曰元吉

十朋二十貝也貝介蟲蚌屬離象古以貝爲貨有五品每品各以雙爲朋太貝四寸八分以上每一朋直二百一十六文十朋直二千一百六十文大龜之直也龜大者長尺有二寸互坤數十偶爲朋故爲十朋之象艮爲黔喙外堅忍而靈知中藏故謙艮主在三而鳴謙在二損艮主在上而元龜在五如人五官杜塞還視返聽故曰弗克違五官不止欲靈龜弗違未

可得也。故曰：自上祐艮止。卽老氏所謂「嗇」，莊生所謂「無受人益」，卽損是益，非分外增加，省事清心，其益无方。

上九弗損益之，无咎。貞吉。利有攸往。得臣无家。象曰：弗損益之大得志也。

九以陽居上爲艮主，下得六三爲應，而柔不可損，故爲弗損。爻自三往成艮，故爲益之言。上无損于三，而能益五也，不損于民，有益于君，故无咎。居高不亢，故貞吉。以陽往上而下得其友，反居益初，則爲大作，故利有攸往。內輔九五，故曰得臣。自下往上，故爲无家。

在下曰家。若益六四自上來下。則爲遷國矣。六五虛已受益之君。九自下往上益之。得君若此。願爲之臣。何以家爲。象曰。弗損而益。是于止德无愧。而損道大成也。損也者。不傷財。不費民也。以弗損益。所以爲止。下悅而止。所以成損。故曰大得志。陽爲大。

損不厭上。損至上而愈吉。下者舉之天之道也。若益極則凶矣。卦體雖損下。下不見損。上寔受益。所以盡善。三損九而下成悅。是以損爲悅也。上受益而成止。是益得于弗損也。弗損于下。自益于上。所以懲忿窒欲。損而无損也。以澤爲山。山成而澤不損。其象如

此

益  震下

序卦傳曰。損而不已必益。故受之以益。天下事未有能自貶損无益者。益所以繼損也。卦本乾坤否。損乾爲巽。益坤爲震。故爲益。益益下。損損下。卦以下爲體也。益益陰也。損損陽也。陽實而乾純陽實之至也。故可損。陰虛而坤純陰虛之至也。故可益。乾在下。邦國富庶之象也。故損下。乾在上。朝廷豐盈之象也。故損上。損上不謂損。而謂益。厚其本也。益上不謂益。而謂損。剥其基也。聖人所以示厚下也。以爲學占之。損益

雖兩名其幾惟一。能損則益。已克而禮復也。夫子絕四。顏子四勿。損之至。而益何加焉。由損入益。守約而施博。道濟天下。知周萬物。如人主本惠心。行惠政。省方觀民。百度具舉。歸于有孚。則其益无方矣。卦體二以上互爲觀風行地上。先王所以省方觀民設教也。初九帝出乎震。仲春雷發聲。時維二月。虞書歲二月東巡守。由震適巽東南行。六二有離象。爲五月南巡守。六三有兌象。秋省斂賑凶。爲八月西巡守。六四遷國營室方中。爲十月朔巡守。九五益事大成。爲惠心五以惠心來。而初以大作往。天子行曰大作。巡守祭

告賑貸遷國皆大作益民之事也。本惠心以訖四國風行雷動靡事不爲。周旋鼓舞而不倦于勤。所以爲益然視之清靜无爲。則有間矣。故益者多識之用而損者貞一之本。損爲要道而益爲功勞。有節用愛民之心而後行省方觀民之事。不然則五霸之會盟秦皇之巡行耳。以是求益計功利而助長不求懲忿窒欲而言遷善改過。是登枝而捐本也。故損不厭上益不厭下。故曰盈日鋤日不除謙日養日不長。損所以終得臣而益所以終被擊也。損元吉无咎可貞利往而益止于利攸往涉大川而已。

益利有攸往利涉大川

益增加也。以上卦之初陽。益下卦之初陰。上好施而巽下受益而動。上下樂利。故利攸往。利涉險。

卦體互觀。爻象后省方。故王享在二。帝出在初。進而上往。內外二卦通爲中行。故有攸往利涉之象。水歸東南。震巽木道順利。其象如此。

彖曰。益損上益下。民說无疆。自上下下。其道大光。利有攸往。中正有慶。利涉大川。木道乃行。益動而巽。日進无疆。天施地生。其益无方。凡益之道。與時偕行。

所謂益者。震下一陽。損自上卦之四。損上益下。故民

悅无疆。初自乾來居坤。陽明下濟。其道大光。所謂利
攸往者。六居二。九居五。中正相應。往有慶也。所謂利
涉大川者。震巽皆木。春夏之交。風雷方興。品物齊見。
由震適巽。木道大行。卦所以爲益也。雷震而動。風巽
而入。二氣相資。進益无疆。乾以一陽下施。爲震。坤以
一陰往生。爲巽。化育生成。其益无方。皆天時爲之。君
子用益。順時觀省。惠心周流。豈以分財爲益乎。

損者損其泰。益者益其否。下泰而損之。未爲不悅。不
若下否而益之。其悅无疆。以下益上。未爲非道。不若
自上而下。其道大光。蓋損下者。上旣益。則下不可復

損益下者下已益而上无欲益之損下不欲傷而益下利賴无窮也

八卦先震後巽益則由巽來震所謂自上下下也然爻本逆數上往爲順自震往巽東南行亦爲順故自初而上有王者順時省行之象所謂與時偕行也惠心在五爲君而震主來自初進而上行內外互坤爲順爲行故三四稱中行所謂中道乃行日進无疆攸往利涉也

象曰風雷益君子以見善則遷有過則改

損乾爲巽風益坤爲震雷是以風益雷也君子觀象

由震至巽方位定而立不易之謂恆。今風來益雷是遷方改位也。遷莫如善。匪巽弗入。改莫如過。匪震弗勇。故以遷就向善。以改易悔過。君子自運其風雷爲益也。懲忿窒慾。遷善改過。損益之要莫大乎是。

損減少也。反爲益則增加矣。山澤靜也。變爲雷風則撓動矣。故損六爻之象。安靜寡營。似顏子之四勿。益六爻之象。檢點觀察。如曾子之三省。卦體自上下下。由乾出震。象帝東出。二以上互爲觀體。雷動爲行。風入爲觀。二至四互坤。爲順爲行。爻有順時觀方之象。六五終之以惠心。此觀省之本也。君子所以遷改獲

益者本諸此蓋損非剥下但不傷財不擾民卽損矣
益非分財但能興利能除害卽益矣如人四肢不妄
緣而心志自益非取外物以益心志也心常能檢省
而衆體自益非裁心志以補手足也

初九利用爲大作元吉无咎象曰元吉无咎下不厚事
也

九自乾四來益坤初爲震震爲帝益下之主也初爲
民大爲陽作起也行也震動之象天子動而行曰大
作詩云王紆保作陽德方亨爲出震省行之象卦體
互觀省方觀民益之事也以休以助故爲元吉无咎

象曰。元吉无咎者。初在下爲民坤厚載物。承天而不能資始代終而不能專成。故震陽來下。大作以厚民事也。夏諺曰。吾王不遊。吾何以休。下不厚事之謂

天子出則六師從。故爲大作。論語云。作者七人亦謂行也。古王者以四時巡守四方。察民疾苦。虞書所謂歲二月帝東巡守之類是也。孟子云。入其疆。土地荒蕪。遺老失賢。下不厚事也。春省耕而補不足。秋省斂而助不給。厚下之事也。王者省方興利除害。二之祈天三之賑凶。四之遷國。皆事之大者。皆以厚下也。損初言已事已卽損也。益初言厚事厚卽益也已止。

也。艮象厚加也。益象

卦體本否。則下自不可不益。損乾益下爲震。則外體自不得不爲巽。震遇巽。自有東南行之象。皆非強設也。

六二或益之十朋之龜。弗克違。求貞吉。王用享于帝。吉。象曰。或益之。自外來也。

六二卽損之六五。反來居下。故其象同在損益上。五承上。故受上益。在益益下。二乘初。故受初益。乾不往。則不成艮。損之五止。由上益也。乾不來。則不成震。益之二動。由初益也。艮止。則五中虛似離。震動。則二中

虛亦似離。離爲龜艮五之龜。以懲窒也。震二之龜。以遷改也。弗克違者。順動之象。二乘厚下之主。享休明之賜。陰柔順承。安貞无疆。故得益而吉。出震適巽。初爲春東。二爲夏南。月令仲夏大雩于上帝。爲民祈穀。巡守所至祭告。必以龜卜。周禮大宰祀五帝卜曰。祀大神祇亦如是也。震主東出南郊用享。祈天保民。故吉。帝出震。故爲享帝。象曰。或益之者。陽自外來益。初二因初受益。非以正應得益也。與損五受上益云。自上來。其辭同。

十朋之龜。明主益下之心也。弗克違。本是心以行益。

下之事也。貞正也。益民者惠而不費。利而不庸。觀民而民休。則安正可以久矣。爲民享帝。亦永貞之事。傳云。自外來。明皆出震。厚下之事也。初之大作。始于二。成于五。中行于三四。三之救災。四之遷國。歸于五之惠孚。乃所謂永貞也。五二正應。故于二言之。

損五乘悅。故用龜以防巧令。益二承風。故用龜以察利病。王者舉大事。動大衆。吉凶之事。皆以龜卜。

古帝王勤民之事。非一。巡守。祭祀。賑濟。建國。四者爲大作。震初象帝東出。南行。故王享在二。上往之象也。三偶互坤。象順時周巡也。初至五似離目。象省視也。

祭祀賑濟建國所至因時舉事以卦體互觀也至五而益道大備故爲惠心風雷无形不測故象鬼神上帝先公祭告也

六三益之用凶事无咎有孚中行告公用圭象曰益用凶事固有之也

六以柔居剛處益下之時故爲益之三多凶雷風相薄象凶災用補助也救民恤災故无咎三五同功五惠心故有孚三與四當内外之中上承惠心之五下乘大作之初木行利涉故皆爲中行雷風周旋之象也告祭告也公先公祖考也詩云于公先王禮云上

祀先公是也。三四公侯之位。王者巡行。則奉廟主俱有事。告而後行。主者。禮神之玉。震爲玉。合璋爲圭。偶象也。詩云。圭璧旣卒。寧莫我聽。亦爲災告也。又周禮典瑞。畛圭以恤凶災。三省斂爲秋。西行之象。風雷无形。有鬼神之象。象曰。益用凶事者。六三有應在上。以上益三。其所固有。與六二益自外者異也。蓋三在損居四。上在損居初。四嘗自損其疾。以辭初之益。今四來三。與上正應。故爲固有之象。凡上之倉廩府庫。原輸自下也。積之豐年。而散之凶歲。因民之利。還以利民耳。況九居上。附益已多。自三視之。皆其固有。孟子

對鄒穆公曰。凶年饑歲。老弱轉乎溝壑。君之倉廩實。府庫充。是上慢殘下。出乎爾者。反乎爾。正與此象合。○周禮大司徒以荒政十二聚萬民。遺人縣都之委。積以待凶荒。三年耕而有一年之食。九年耕而有三年之食。所以備凶歲者。已預于平日。公家蓄積以待興發。非如後世倉卒苟且。征權算商之術。故曰固有之。國家有固有之益。何憂于凶歲乎。

圭割玉爲之。天子祀天之圭。合四爲一。下有底。春官典瑞云。四圭有邸。以象天。初奇象邸。二三偶象四圭。上下之際。象圭合也。圭判曰璋。常圭中邊判爲二璋。

以爲瓚柄三偶之象

六四中行告公從利用爲依遷國象曰告公從以益志也

六以陰居四爲巽損上之主也近君有公象其德爲順以柔承剛入而能順有告卽從之象風无形鬼神
之象言將遷國而告于先公神謀協從也六自坤來
居四易九往居初有遷國之象坤爲地在上有國象
依因也蓋因損四而成故爲爲依遷國依四也益之
六四自上來下故爲遷國損之上九自下往上故爲
无家臣有家君有國也遷國損上之象震爲長子封

國之象。四象冬北行十月定中。故爲遷國。詩云。定之方中。作于楚宮是也。象曰。遷國所以安民。告公從者。以益民之志。告于先公也。古者大事。告于祖而後行。九五有孚惠心。勿問元吉。有孚惠我德。象曰。有孚惠心。勿問之矣。惠我德。大得志也。

九五陽剛中正。爲損上益下之主。自初出震以來。省方中行。至于五而益道備矣。初至四。卦體似復。見天地之心。故爲有孚惠心。其象爲后不省方。二至上又互觀其象。爲省方觀民。故九五以大觀在上。巡守祭告。賑災遷國。自初以來。无一非惠民之實心。心爲政。

本有是心。卽勿問其事可知也。真大作厚下之主。故初與五皆爲元吉。五似坎爲心。君有惠心。民自信孚。謂惠我以德。非分財之惠耳。惠莫大于心。益莫大于孚。所以元吉。象曰有惠下之誠心。自无往非惠民之實事。故可勿問之矣。惠民以德。則下實受益。所謂天施地生。其益无方。益道大成。故曰大得志。

爻辭九五初九皆稱元吉。九五孚惠之心。于初作始。初九孚惠之德。至五成終。勿問反兌之象。兌爲口。

上九莫益之。或擊之。立心勿恆凶。象曰莫益之。偏辭也。或擊之。自外來也。

益惡過高。上九以陽居亢。巽爲長高。爲近利市三倍。求益无厭。故爻爲拒絕之辭。曰莫益之。乘九五益民之主。以陽實加其上。貪多自利。故五欲擊之。五非正應。故曰或也。五居中有惠心。立于心之上而孚不如五。故爲立心不恆之象。五所以欲擊之而凶也。凶者將變之象。五擊上落。則復爲損。五互艮爲手。有擊象。風雷爲恆。反恆爲益。益上卽恆三。故其象无恆同也。象曰莫益之者。惡上九專利爲偏拒之辭耳。非謂莫益六三也。或擊之者。非六三在內往擊九五自外來擊也。蓋三云益之上。云莫益之。疑于莫益三也。上云

或擊三以震應。疑于內擊也。故傳明之。

巽究爲躁。六三以凶事下應風雷交極有擊之象。三以凶事告益。上以亢陽處益。有不肯損之象。五在中爲心上九以高長立其上爲立心之象。上在損居初爲兌。嘗悅以益。四今反爲巽居上。躁以拒三。故爲不恆之象。倣利而行。人皆拒之。求多招侮。故凶。

周易正解卷十二終